

Reducir ils custs

Il survegliader dals pretschs vesa potenzial

DA LUCAS DEPLAZES / ANR

■ Il survegliader dals pretschs vesa sin divers secturs dals servetschs publics in potenzial da spargn. En connex cun il franc svizzer survalità han bleras interpresas attadà svelt ils pretschs per products importads.

Sco quai che ha punctuà *Stefan Meierhans*, il survegliader dals pretschs, a chaschun da sia conferenza da medias annuala a Berna èn stadas en il focus l'onn 2015 las tariffas da divers servetschs publics. Meierhans ha accentuà il svilup dals custs sin il sector da la sanadad publica. Quels custs èn s'augmentads ils ultims onns bler pli ferm che las pajas e la chareschia. Il survegliader dals pretschs ha calculà la basa da referenza per fixar las pauschalas per cas l'onn 2015 sin 9592 francs. Sin fundament da quest resultat vul Meierhans suttametter sias recumandaziuns als chantuns. En vista a la revisiun dal Tarmed (calculaziuns per las singulas prestaziuns medicinalas) ha el era formulà sias recumandaziuns.

Medicaments memia chars

Gronds quitads fa il survegliader dals pretschs davart ils custs per ils medicaments. Deplorablament na dastga la confederaziun – sin fundament d'ina decisiun dal tribunal federal – betg pretender ina reducziun dals pretschs per tscherts medicaments durant ils onns

2015/16, cumbain che quai lubiss da realisar intgins tschients milliuns francs. Meierhans crititgescha er la tariffa da conversiun per medicaments importads che saja restada ad 1.29 francs en relaziun cun l'euro. En cumparaziun cun l'exteriur custan medicaments da generica en Svizra il dubel.

Cartas dal di per 29 francs

Sin il sector dal traffic public ha il survegliader dals pretschs cuntanschi

in accord supplementar che prevesa ina reducziun dals custs da 29 milliuns francs durant dus onns. Actualmain vala ina segunda runda cun ils bons da 10 francs per tgi che dispona d'in abunament da mesa classa.

Davent dal prim da mars 2016 datan las Viafiers federalas or 100 000 cartas d'acziun. Quellas cartas custan 29 francs per tgi che ha in abunament da mesa classa, èn dentant valaivlas pir davent da las nov la damaun. La

pretensiun dal survegliader dals pretschs d'adattar l'indemnisaziun per la rait electrica als tschains sbasads vegn il cussegl federal a realisar l'onn 2017. Ils consuments da la forza electrica vegnan a profitar d'ina reducziun da 170 milliuns francs.

Reclamaziuns ed acziuns

L'onn passà ha il survegliader dals pretschs tractà 2043 reclamaziuns dals burgais. Il pli savens è stà per tutgà il sector da la sanadad publica cun var 12%. Sin segunda posiziun èn stadas reclamaziuns davart tariffas dal traffic public.

Bleras reclamaziuns ha il survegliader dals pretschs retschet or dal sector dal servetsch public sco telecomunicaziun. La Posta e la branscha da finanzas.

En tschintg cas ha il survegliader da pretschs cuntanschi in accord d'encliegentscha. Las autoritads han suttamess al survegliader dals pretschs 545 revisiuns da las tariffas per sia examinaziun. En 85 cas ha el dà ina recumandaziun, specialmain sin il sector da la sanadad.



Il survegliader dals pretschs Stefan Meierhans.

KEYSTONE